

# MAAKI

## 4

*Vaintivano sara suku pisaqi vurara tura*

<sup>1</sup> Sisasiva nruka tosani uro mwariro nraase qora mwasaasa timwa nyiase tuvanta nraase qora vaaqaravano ntunu nukaama mwainta mwira ututuma sovarora tiro, Sisasiva pisero mpotuqi uro mwaari nero mwiraqi mwataqaa mwairo nramaiqaa mwauvanta nraase qoravano mwutuni nramai tosana mwaura.

<sup>2</sup> Mwisua nramai tosana mwataqaa mwauvaro Sisasiva mwo kua mwo kuaqaa nuase tiro timwa nyura.

<sup>3</sup> Sisasiva tiro, Ne tiarinta riaate. Vainti mwovano sara suku pisarero vurave.

<sup>4</sup> Mwiva sara suku pisaqiro vuvaro sini sukuvano aara tosani untu nuvaro kurivano mwiri mwira nramwa sorave.

<sup>5</sup> Mwitaa suvaro sara suku mwonrayuvano ori mwataqaa untu nuvaro mwatavano sia mwevaniqama vau mwatava vasuvarora tiro sukuvano untu niro vaavaama kutovaro

<sup>6</sup> suarivano nrinero itamaqi viro aasaraqama sovaro mwira tuqavano sia mwataqi mwevani vurara tiro, aasarama urave.

<sup>7</sup> Mwitaa suvaro sara suku mwonravuvano kuankusa kutoraqi untu niro kuankusa vaqamase nivuvaro kuankusavano suku mwira numwaqu sovaro sukuvano sia tava riorave.

<sup>8</sup> Mwitaa suvaro sara suku mwonravuvano suqe su mwataraqaa untu niro suqemaseniviro

uro suqema tava riatovaro sini suva mwira  
 aatarase niviro uro suqe tava vaaqara tava  
 riatovaro sini suva mwira aatarase niviro uro  
 suqe tava vaaqara tava riatorave, tiro.

<sup>9</sup> Sisasiva mwi kuaqaqa nuase timwa taiqase  
 tiro, Ini aato vasirente mwi kuara qintutamase  
 riaate, tiro.

<sup>10</sup> Sisasiva kua timwa nyi taiqa sovanta nraase  
 qoravano nyiari mwaqa nyiari mwaqa vuvaro  
 Sisasiva nraria mwauvanta mwira nraqiara 12  
 nrauvanovaqa mwo susuavaqa Sisasiva  
 mwaunani nrinenta Sisasiva mwi kuaqaqa  
 nuase tu osarara sia qintutama siraitinta,  
 mwisua Sisasira mwata riovaro

<sup>11</sup> Sisasiva mwisua timwa nyiro tiro, Kotiva  
 nraase qoraqaqa naqisiari kuara qumpau tai  
 kuara mwi kuara Kotiva iniara qaqi sairanta  
 mwi kuara osara riaate timwase mwiva qaqi  
 nraase qora qaqini mwaisua mwi kuara osara  
 sia qintutama sera timwa nyiane tisana ne mwi  
 kuaqaqa nuase mwisua timwa nyitana sia mwi  
 kuara osara mwisua timwa nyuko.

<sup>12</sup> Ne mwo kuaqaqa nuase tiarinta  
 nraase qoravano rientama  
 sia qintutamase rievareve.

Mwisua ni kuara aato tarase  
 sia qintutamase rievareve.

Mwisua nyiari sia suqe si airara  
 qaqira pisaisarove

Kotiva mwisua nyiari sia suqe si airara  
 mware kuara nukaama nataanarove, tiro.

<sup>13</sup> Sisasiva mwitaa timwase mwinravusua  
 tiro, Né mwo? Ne mwi kuaqaqa nuase tu

osarara né siave qintutama riaavo? Né sia mwi kuara osara qintutama riaraitinta naantiara ne mwo kuaqaavaqa nuasena tiari kuara né ntataama senta so qintutamase rieverave?

<sup>14</sup> Ne ota mwi kuaqaava nuase tu osarara ini timwa nyirenave.

Vaintivano sara suku mwataqi pisora mwi kuara osara vairero Kotira kuama vaiso.

<sup>15</sup> Sara sukuvano aaraqaqa untu nora mwira osara vairero vainti nraase qora mwonravuvano mwi sukura votaama mwariasuave. Mwi vainti nraase qorasua Kotira kua riaavaro Saataaniva nrinero mwisua vu aato mwuntusaqintai mwi kuara navisi mwarairave.

<sup>16</sup> Ori mwataqaqa untu ni sukura osara vairero nraase qora mwonravuvano mwariasuave. Mwinravusua Kotira mwasaasa rienta mwi kuarara riariamase mwariavaro

<sup>17</sup> kuavano sia mwisua mwuntusaqi visanta mwi nraase qorasua sia mwi kuara mwo nrau mwo nrau riaraitinta mwariavanta, mwi kuara saara mwo siasua mwisua sia suqema utu nyatare siavanta mwisua tiri rivorave tinta Kotira kua vaa qaqira pise mwaria vainti nraase qorasua mwarairave.

<sup>18</sup> Nraase qora mwonravuvano kuankusa kutoraqi piso sukura votaamase mwariasuave.

<sup>19</sup> Mwi nraase qorasua Kotira kua rienta mwiraqaantai mwisua mwataqiaa irainarara nroraqamase riaqinta vitanta monorave mwo irainararave riariaqai vitanta mwo irainara mwo irainara mwararenta riaqinta vinta Kotira kua qaqira pisaavaro Kotira kuavano sia mwi nraase qorasuaqi vaisanta mwarairave.

20 Mwisua mwitaa siavanta mwo vainti nraase qoravano suqe mwataqaa untu ni sukura votaama mwariasuave. Mwi nraase qorasua Kotira kua rienta mwi kuarara qutaave tinta mwi kuara riaqinta vinta suqe aira Kotirani mwaqi vuarave. Mwisua sininravuvano Kotira kua rietanta aatarase suqe aira Kotirani mwaqi vinta mwariavanta sini nravuvano mwisua aatarase suqe aira Kotirani mwaqi vinta mwariavanta sini nravuvano mwisua aira aatarase suqe aira Kotirani mwaqinta vuarave, tiro. Sisasiva mwi kuara turama.

## 5

### *Sairaasiva Sisasira uro vitora*

21 ...Sisasiva mpotuqi viri nane nrukaqi tare sinyaa tarasini vuvanta mwini nraase qora vaaqaravano suntu nukaa nukamase Sisasiva mwaunani ututuma mwauvaro

22 vainti mwovano mwi mwatusaraqi mwaara nraavuqaa naqisi mwauva Sairaasiva mwiri nriro Sisasira takue uro mwira iqutarani untu niro

23 mpo se tiro Sisasirara tiro, Ni naavuravano qutuariva mwataqa vaiso. Revaqa vaa nritara rena saqu mwiraqaa mwatairaro mwira qaravano taiqairaro so qaqi mwariarive, tiro.

24 Mwi vaintiva mwitaa tuvaro Sisasiva mwiravaqa vura.

35 ...Sisasiva mwiravaqa aarana vi mwauvanta vainti mwonravuvano Sairaasira nraavuqintai nritanta Sairaasira vitenta mwirara tinta, Mpo, ri raavuravano qutu viso. Mwaara ti mwai vaintira re sia navaata vuane, tuvaro

<sup>36</sup> Sisasivavaqa mwinravusua kua riero mwaara nraavuqaa naqisu vaintirara tiro, Sia aatu siane. Re niara nroraqamase riaane, tuvo.

<sup>37</sup> Sisasiva mwitaa timwase mwiva Pitaaravaqa, Semisiravaqa, Semisira qata Soniravaqa, mwinravusua aasu ntita mware

<sup>38</sup> uro Sairaasira nraavuqi uro takuovanta vainti nraase qoravano nroraqama senta mpo tinta nate mwauvaro

<sup>39</sup> Sisasiva nraavuqi mwaari nero tiro, Narare né nate mwariavo? Mwi kuaasiva sia qutu viso. Mwiva qaqi vaite mwaiso, tuvo.

<sup>40</sup> Sisasiva mwitaa tuvanta mwisua Sisasiva tu kuarara qaqi aaritara suvaro Sisasiva esaa nraase qora raaqu mwaaqani se kuaasi mwira nrosua qosuavaqa, taaramonravu nraivaqa nrusuavaqa, Sisasiva mwinravusua aasu ntita mware kuaasivano qutu vunani uro

<sup>41</sup> mwira saqu tuaarere nrari kuanantai tiro, Tarita kumi - mwaa kuaasio, ne riarara nti vuane tuko, tiro.

<sup>42</sup> Sisasiva mwitaa tuvaro mwi kuaasiva vaa ntiviro nrue mwauvo. Mwi kuaasiva 12 isi mwarasova ntiviro viro nraro mwauvanta mwinravusua mwira takuenta mpo mpo tinta saqu nunkinkiraara tenta tinta mwauvaro

<sup>43</sup> Sisasiva mwinravusuara irora siro tiro, Né mate takuaa airara sia mwo vaintivaqa timwa nyiate. So mwaa kuaasirara sara aasu mwiate, tuvo. Sisasiva mwi kuara turama.

## 6

*Sisasiva pata sara vaaqara vaqamase nura*

<sup>31</sup> Mwo ena vaaqara nraase qoravano Sisasira takuarenta vitare nritare si mwauvanta Sisasivavaqa nrai vaintivaravaqa sia so sara nrarenta qaqi mwauvaro Sisasiva mwitaa tiro, Vivaqenravu sia vaintivaqa sisanta uro mwariare, tiro.

<sup>32</sup> Mwitaa timwase nrai vaintivaravaqa ntitero mpotuqi mwaari nero nramai nrukaqi tarero qumina santa virero vura.

<sup>33</sup> Mwinravirusua mwini senta vuvanta vaaqara nraase qoravano mwinravirusua takuenta mwinravirusua mwini virenta sunaniara rienta mwo mwatusaqi mwo mwatusaqintai mwisua sanenta nramai nruka tosantata mwata nuna sanenta uro Sisasiva vuase tunaniara mwisua nanenta uro nenta.

<sup>34</sup> Mwisua nanenta uro novaro Sisasiva uro ne mpotuqintai mwataqi mwaavi ne takuovanta nraase qora vaaqaravano nukaa sinta mwauvaro Sisasiva mwisuara mpo tiro mwitaa tiro, Vaintivano sia sipisipiqaqaa naqisi mwarisanta sipisipivano nyariara sampi nrue mwaria sipisipisua mwisua votaasua mwaa nraase qorasuavaqa sampi nrue mwariavo, tiro. Mwitaa timwase Sisasiva mwinto mwaitaro mwisua mwo kua mwo kua timwa nuvo.

<sup>35</sup> Sisasiva kua tiaqi vuvaro suarivano tukiro vuvanta Sisasira vaintinravuvano mwirara tinta, Mwaini qumina mwatasantave. Ena siaso.

<sup>36</sup> Re nraase qora ntusi tiranta mwisua mwo mwatusa mwo mwatusa nruenta ori ninta sara mwaraate. Mwisua sia saravaqa mware nriasuave, tuvo.

<sup>37</sup> Sisasira vaintinravuvano mwitaa tuvaro Sisasiva qao tiro, Néntavano sara mwisua niate,

tiro. Mwitaa tuvanta mwinravusua qao tinta, Te nrora orive 200 kinaave sove ninta sara mwasenta mwisua niaraarave? tuvo.

<sup>38</sup> Mwisua mwitaa tuvaro Sisasiva nrai vaintinravu mwata riero tiro, Nara nara mpereti sarave vaiso. Né uro takuaate, tiro. Mwitaa tuvanta mwinravusua uro takuenta Sisasira timwa mwinta tinta, Mpereti sara nkuaa saquru aasu vaiso. Tavusa taarama aasu vaiso, tuvo.

<sup>39</sup> Mwinravusua mwitaa tuvaro Sisasiva nraase qorara tiro, Né esaa musau santa mwataqaa mwariate, tiro.

<sup>40</sup> Mwitaa tuvanta mwisua mwo santa 50 nravuvano mwataqaa mwauvanta mwo santa 100 nravuvano mwataqaa mwauvanta mwitaamaqi vinta vinta esaa nraase qoravano mwataqaa mwauvaro

<sup>41</sup> Sisasiva mpereti nkuaa saquru mwase tavusa taarama mwase naavuni takuetaro Kotirara saparamase sarara sugemave, tiro. Sisasiva mwitaa timwase mpereti sara uveqase mwiva nrai vaintinravu niro tiro, So né sara mwarenta uro mwisua nivanta mwisua esaa nraate, tiro. Sisasiva mwitaa timwase mwiva tavusa taaramavaqa mwase airase nyuvo.

<sup>42</sup> Sisasiva mwi sarara nrai vaintivanravu nyuvanta mwinravusua uro nraase qora nyuvanta mwisua esaa so nrorama.

<sup>43</sup> So nrovanta Sisasira vaintinravuvano mwiraqaantai vunato tuara nrora tua mwarenta uro nraase qoravano mperetivaqa tavusavaqa nretanta viti piso sarara suntu senta nrora tua 12 nravu ntunu senta kuraama sorama.

<sup>44</sup> Mwi enara 5000 qoravano mwi sarara nrovanta nraase vaaqaravanovaqa mwi sarara

nrorama...

## 10

### *Sisasiva Vatimiasira vu mpaireda sora*

<sup>46</sup> Sisasiva nrai vaintivaravaqa viro Seriko mwatusani uro viro mwi mwatusara aatarero vire suvanta nraase qora vaaqaravano mwira vataqinta vi mwauvaro vu qimpa vu vaintiva Vatimiasira Timiasira mwaaquvano mwariro mwitaa su irainarara naaru tiro miate ti mwau vaintiva aara tosani mwataqaa mwairo.

<sup>47</sup> Mwiva mwini mwaitaro Sisasiva Nasaretinyaava nritaraarirara riero mwiraqaantai mwiva nroraqamase Sisasirara saparamase tiro, Sisasio, Ntevitira mwaaquo, re niara mpo tiane, tuvo.

<sup>48</sup> Vu qimpa vu vaintiva mwitaa tuvanta nraase qora vaaqaravano mwirara irora tinta, Re o suvaitaane, tuvaro mwi vaintiva sia mwisua kua riarero qava nroraqamase saparamase tiro, Ntevitira mwaaquo, niara mpo tiane, tiro.

<sup>49</sup> Vatimiasiva mwitaa tiaqi vuvaro Sisasiva mwiraqaa ntiviro mwairo tiro, Sapara sivaro nriarive, tuvanta mwisua vu qimpura saparamase tinta, Re riariamase mwariane. Nti vuane. Mwiva ri sapara siso, tinta.

<sup>50</sup> Mwisua mwitaa tuvaro vainti mwiva nrai vaaqa utora raaqu qaqini se ntiviro Sisasiva ntiyi mwaunani vuvaro

<sup>51</sup> Sisasiva mwira mwata riero tiro, Ne ri ntataa siase tukare re nriaro? tuvaro vu qimpa vuva tiro, Mwaara tiara vaintio, re ni mpu mpaireda saane tina nrukavave, tiro.

<sup>52</sup> Mwitaa tuvaro Sisasiva tiro, Re so vinarave. Re niara mwiva so ni saisaqa sianarove tiararoma ri vuvano suqema viso, tiro. Sisasiva mwitaa tuvaro mwira vuvano mpaira vuvaro mwi vaintiva so takuora. Mwiva so takuova Sisasivavaqa mase aarana vura.

## 12

*Uaini sana mwara tutoraqaa sia suqemase naqisu vaintisuara tura*

<sup>1</sup> Sisasiva mwitaa timwase mwo kuaqaa nuase mwisua timwa nyiro tiro, Vainti mwovano uaini sana mwara tute tosani urisa rate mwata qukuse uaini tava tatiarira ututuse vaivaraara tainta utute mwate niarani mwo mwatani virero siro mwo susua timwa nyiro tiro, Né ni uaini vutaqaa ninani naqisi matenta né sini uaini tava siqisenta nénta mwaretanta sini uaini tava mwara ninani mataate, tiro. Mwitaa timwase mwiva niarani mwo mwatani vurama.

<sup>2</sup> Mwini uro mwauvaro uaini tava siqu enava nrinovaro mwiva nrai aira vainti mwo titero tiro, Re uro ni nraasoqaa naqisi mate mwaisuara tiranta uaini tava ninanivaqa siqi mataate, tuvaro

<sup>3</sup> mwira aira vaintivano mwini vuvanta mwira nraasoqaa naqisi mwate mwau vaintisua mwira aira vainti navaatavu senta saavuqaantai mwira nuqutuse mwatenta sia uaini tava siqi mwiraitinta, qaqi mwira titovaro uro nane vura.

<sup>4</sup> Qaqi uro nane vuvaro nraaso qova nrai aira vainti mwo titovaro vuvanta mwira nraasoqaa naqisi mwate mwausua mwira aira vainti qiata rasenta sauri irainara mwurama.

<sup>5</sup> Mwitaa suvaro nraaso gova nrai aira vainti mwo titovaro vuvanta mwisua mwira rusenta. So mwitaamaqi vinta sini mwira aira vainti titosua saavuqaantai nuqutusenta sini rusorarama tina.

<sup>6</sup> Mwira aira vaintinravu taiqa sovaro vainti nkuaiqa aasu mwaura. Mwi vaintiva nraaso qora mwaaquvano mwauvaro mwira gova nrai mwaaquara mwuntusa nuvaro mwau vaintiva mwauvaro mwira gova mwiravaqa naantiara esaara titero tiro, Mwisua ni maaqu takuenta niara mwira mwaaquve titanta mwira sugema mwatevarave, tiro.

<sup>7</sup> Mwitaa timwase nrai mwaaqu titovaro mwini vuvanta mwira nraasoqaa naqisi mwate mwau vaintisua mwira mwaaqu takuenta nrai timwa mwi nrai timwa mwinta tinta, Mwira gova qutu viraro mwaa vaintiva nrai qora mwatavaqa mwitaa irainaravaqa mwaraarivama mwaiso. Mwaraivaqe te mwira rusaararo mwiva mwarare siari irainarava tirini aasu vasiarive, tinta.

<sup>8</sup> Mwisua mwitaa timwase mwira mwaaqu navaatavuse ruse mwaatani mwaati mwira pisorave, tiro.

<sup>9</sup> Sisasiva mwitaa timwase mwiva nraase qora mwata rie tiro, Mwisua mwitaa surara tiro, nraaso gova nrai mwaaqu rusorara ntataave sianarove? Nraaso gova nrine nrai nraasoqaa naqisi vaintisua ru taiqase mwonravuara tiro, Né ni nraasoqaa ninani naqisi mataate, tianarove.

<sup>10</sup> Né siave Kotira vukuqi mwaa kuara saara nitanta riaavo? Mwi kuava mwitaama tiso:

Ori nraavu utitanta mwo oriara  
sia suqe orive timwase qaqira pisaa oriva  
mwi oriva pusa oriqama viso.

<sup>11</sup> Kotiva mwi orira mwarase nroraqama sairara  
tinta, te Kotira aira takuetanta suqe airave  
turo, turave.

Kotira vukuqi mwitaama qumwaara torave. Né  
siave mwi kuara qumwaara tetantave  
qintutama riaavo? tiro.

<sup>12</sup> Sisasiva mwitaa tuvanta Iutaa nrora  
vaintivaravano qintutama riovaro Sisasiva uaini  
vutaqaa nraqisi mwato vaintisuara titaroma  
mwiva mwisuaqaa nuase tuvanta mwisua  
Sisasira navaatavuse ko mwiare timwatenta  
nraase qoravano mwiraqi suntu nukaa  
nukasusua tiri irora sivo tinta mwisua aatu sinta  
sia Sisasira navaatavu saraitinta, qaqira pisenta  
vurama...

## 15

### *Sisasiva Pairaativa mwaunani vitaqinta uro sora*

<sup>1</sup> Mwi qararaara toqaqi Kotira aira mwara  
mwatate mwau vaintisua mwisua nrora  
vaintivaravaqa, Iutaa nrora vaintivaravaqa,  
mwaara osara ti mwau vaintisuavaqa, esaa  
kaanasori vaintivaravaqa, mwisua suntu  
nukaama vinta mwaitanta mwisua tiare tu  
kuara suntu nukaama mware Sisasira seni  
sanaqaantai mwira rumpa mware Pairaativa  
kamaanira nrora vaintivano mwauraqi uro sora.

<sup>2</sup> Uro sovaro Pairaativa Sisasira mwata riero  
tiro, Qutaave re Iutaa mwatanyaasua ntaarunya  
vaintivano mwariaro? tuvaro Sisasiva tiro, Re  
tiarava ne mwaa mwivama siso, tiro.

<sup>3</sup> Mwitaa tuvanta Kotira aira mwara mwate mwau vaintisua mwisua nrora vaintinravu mwo kua mwo kua saara Sisasira irora si mwauvaro

<sup>4</sup> Pairaativa mwisua kua rietaro qava Sisasira mwata riero tiro, Re siave nyarivaqa tinarave? Mwisua vaaqara kua saara ri irora si mwariavo, tiro.

<sup>5</sup> Mwitaa tuvaro Sisasiva qava kempusaqamase sia kua tiraitiro mwauvaro, Pairaativa vaaqara aato ti mwaura.

*Naqu vaintisua Sisasira kuaaritarama mwatenta mwira nuqutura*

<sup>16</sup> Pairaativa nrai naqu vaintisua ntaquqi Sisasira pisovanta mwisua mwira vitaqi uro kamaanira nraavuqi se mwisua nyiari sena naqu vaintisua esaa sapara sinta suntu nukaama mwainta

<sup>17</sup> Sisasirara mwoqanyaa kua tinta ntaarunyaa vainti vaaqa votaa sura rumpa mwataare tinta nraare vaaqa rumpa mwatenta mwiraqaantai quki sana mwarase qututumase ovaqa votaamase Sisasira qiataqaa qumwa tenta

<sup>18</sup> munaqamase mwisua nyiari ntaqu vuriqaa mwatetanta muna kua timwa mwinta tinta, Iutaa mwatanyaa ntaarunyaa vaintio, re mwarirave? tinta.

<sup>19</sup> Mwitaa timwase mwisua saavuqaantai Sisasira qiata nukavusenta mwiraqaa taara visise mwira vuqaa tori naquntanenta muna riariasitanta mwaura.

<sup>20</sup> Mwitaamaqinta vitanta mwira nuqutu senta aaritara sinta taiqase mwiraqaantai mwisua nraare vaaqa rumpa mwatora avanuse Sisasira

nrai tuavaaqa utu mwatenta mwira satariqaa  
niri rutenta siritarenta Sisasira vita mwarenta  
vurama.

*Sisasira satariqaa niri rutenta siritora*

<sup>21</sup> Naqu vaintinravusua Sisasira satariqaa niri  
rutenta siritarenta sitanta mwira vitaqi  
mwatusa mwaaganani aarana vi mwauvaro vainti  
mwovano mwira utu Saimoniva mwintairo  
nrora mwatusani virero suvanta mwisua  
mwirara kempusaqamase tinta, Sisasira satari  
re mwara qu mwarera uro mwataane, tuvaro  
Saimoniva mwira satari mwara qu mwarero uro  
mwatora. Saimoniva Sairini mwatanyaava  
mwiva Arekisantasia Rupusua mwitana  
qovama mwaura.

<sup>22</sup> Mwisua Sisasira vitaqi uro qumina santa  
Korokotave tunani sora. Korokota mwaa  
kuaraqintai tirenta, Qiata Mwusaari santave,  
tunani Sisasira uro se

<sup>23</sup> uaini nramai mwiraqi sunkavu irainara  
kuantase mwato nramaira mwira mwirenta  
suvaro Sisasira sia nrora.

<sup>24</sup> Sia nrovanta mwisua mwira satariqaa  
niriqaantai rutenta mwira tuavaaqa mwarase  
ntasua ntasua so mwarevarave timwase mwisua  
kaati ruanema setanta ori pisetanta Sisasira  
tuavaaqa ntusamase mwarora.

<sup>25</sup> Toqaqi suarivano mamatama vauvanta  
Sisasira satariqaa rutora.

<sup>26</sup> Mwira satariqaa rutenta Sisasira qiatani  
kua mwo mwira ko timwa mwato kuara  
qumwaara ratenta satariqaa rutovaro mwi  
kuava mwitaama tiro, MWAA VAINIVA IUTAA

MWATANYAASUA NTAARUNYAA VAINTIVE, tiro.  
Mwi qumwaarava mwitaama vaura.

<sup>27</sup> Mwisua Sisasira satariqaa rutetanta  
Sisasiravaqa vainti taaramavaqa rutovanta  
mwitana muara mware mwausua mwauvanta  
mwisua vainti mwo Sisasira saqu tanaranani  
niri rutenta vainti mwo Sisasira saqu  
saantotanani niri rutora.

<sup>28</sup> (Sisasiravaqa mwitanavaqa rutorara tiro,  
Kotira vukuqi kua mwo qumwaara tova mwiva  
qovara sura. Mwitaama tiro: Mwiva sia suqe si  
vaintisua vaqamase mwarianarove, tura.)

<sup>29</sup> Mwitaama rutovanta nraase qoravano  
vitare nritare sinta mwiri takuenta nyari vauru  
iqisenta Sisasira sia suqe kua timwa mwatenta  
tinta, Qike, re tira, Kotira nraavu mpaيرا senama  
taaramo enaqaa aira mwaretanama qava soqa  
taiqa saasarave, tianara mwo?

<sup>30</sup> So rena saisaqa siane. Rena satariqaantai  
miavi naane, tinta.

<sup>31</sup> Mwisua mwitaa ti mwauvanta mwisua  
tunemasenta Kotira aira mwara mwate  
mwausua mwisua nrora vaintivaravanovaqa,  
mwaara osara ti mwau vaintisuavaqa, mwisua  
Sisasirara aaritarama mwate tinta, Mwiva mwo  
siasua nraasu saisaqa si mwaiva siana nrai so  
saisaqa sianarave.

<sup>32</sup> Mwiva Kotiva titai vaintiva Mesaia  
vaintivanove mwaiso? Mwi vaintiva Isaraari  
mwatanaa ntaarunya vaintivanove mwaiso?  
Saqa te mwaitanta takuaararo mwiva nrai  
satariqaantai miavi nero mwatani tukirere te  
mwirara qutaa tiare, tinta...

# 16

## *Sisasiva qutu vuraqintai qava qaqi ntivura*

<sup>1</sup> Sarareqaa Iutaa mwatanaasua mwaara ena taiqovanta Mariaava Makataaranyaa nraasevanovaqa, mwira kokova Iemisira nrovavaqa, Saromevavaqa, mwi nraasesua ori aquse suqemase mwunta vu irainarara mwaqinta Sisasira mwavanaqaa qumwatarenta vura.

<sup>2</sup> Saante toqaqi suariano mwirini nruvanta mwinravusua Sisasira qunama toraqa virenta vura.

<sup>3</sup> Aarani vitanta mwinravusua nrai mwata rie nrai mwata rie tinta, Tenravu mwini uro naararo ntavave ori nrora qentana suvaito orira raaqu timwataanarove? Mwi oriva nrora orima vaiso, tinta.

<sup>4</sup> Mwitaa timwase mwinravusua nrinenta takuovaro ori qaqinani raaqu qaqini sova vaura.

<sup>5</sup> Orivano mwitaama vauvanta takuenta mwinravusua oriqa mwerane takuovaro vainti mwo qaraasa vaintivano tasuqu tuavaaqara ututo vaintiva mwiraqi sini saantaqaqi mwataqaa mwaura. Mwiva mwiraqi mwauvanta mwira takuenta mwinravusua aato suvaro

<sup>6</sup> mwiva tiro, Sia aatu siate. Sisasira Nasaretinyaara satarigaa rutaa vaintira nénravu mwira mpuaasi mwariavo? Mwiva sia mwaqaqi mwaiso. Mwiva qaqima ntiviso. Nénravu takuqaate. Mwaini mwira mwataanani siama mwaiso.

<sup>7</sup> So mwaa kuara mwaqinta uro mwira nraaqiaravaravaqa, Pitaaravaqa, timwa nyiate. Mwitaama timwa nyiate. Mwiva naane ini ntuni

Kariri mwatanimu viso. Nénravuvaqa mwini uro vinta mwira takuevarave. Ntaaru mwiva mwaitaro mwirara ininravu timwa nyura mate mwivama qovarama viso. Mwi kuara timwa nyiate, tiro.

<sup>8</sup> Mwiva mwitaa tuvanta aatu sitantara tinta mwinravusua Sisasira qunama toraqintai mwevane sanenta aarani vitanta sia mwosuavaqa timwa nyiraitinta vura.

**Veqaura Baibel**  
**Portions of the New Testament in the Veqaura**  
**(Meauna) dialect of the Omwunra-Toqura (South**  
**Tairora) language of Papua New Guinea**  
**Sampela hap Nupela Testamen long tokples Veqaura**  
**long Niugini**

copyright © 2012 Wycliffe Bible Translators, Inc.

Language: Veqaura (Omwunra-Toqura or South Tairora)

Dialect: Veqaura (Meauna)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-03-19

---

PDF generated using Haiola and XeLaTeX on 11 Mar 2026 from source files dated 12 Dec 2025

7f17bf7b-ed7f-57a2-89c1-2b7308ad99ef